

## CLXI

**1330-XII-8, Sevilla. Provisión real de Alfonso XI al concejo de Murcia, eximiendo del pago de dos dineros por dobla a los mercaderes de Aragón que viniesen a Murcia y a Mula. (A. M.M. C.R. 1314-1344, f. 55 r).**

Don Alfonso, por la gracia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo de la çibdat de Murçia, salut et gracia.

Sepades que Diego Martinez de Ferreruella et Pero Gras, vuestros mandaderos que anbiastes a mi, me dexieron que la reyna de Aragon, mi hermana, et el infante don Fernando, mio sobrino, que dieron sus cartas para a Orihuela et Alicante et a otros logares que sy ellos non pagasen la inposiçion de los dos dineros por dobla y en Murçia et en Mula, segunt fue puesto entre mi et el rey de Aragon, que uos que lo non pagasedes en los dichos sus logares. Et que me pediades merçed que touiese por bien que non pagasen inposiçion y en Murçia nin en Mula los de Orihuela et de Alicante et de los otros logares del sennorio del rey de Aragon, que la non tomasen los vuestros vezinos de Murçia nin de Mula, et esto que seria muy grant mio seruiçio; et otrosy, que enbiase mandar a Miguel de Rallad que de los marauedis que recabdo desta inposiçion que feziere ende pago a los querellosos que auian reçebido las malfetrias. Et yo touelo por bien.

Porque vos mando que daqui adelante que non consintades a Miguel de Rallat nin a otro alguno que aya de recabdar los dichos dos dineros por dobla y en Murçia nin en Mula, que tome nin coja la dicha inposiçion a los de Orihuela et de Alicante et de los otros logares del sennorio de Aragon do lo non demandaren a los otros vezinos de la dicha çibdat et de Mula. Et mando al dicho Miguel de Rallat que de los marauedis que ouiere cogido de la dicha inposiçion que faga hemienda et paga a los vuestros vezinos, segunt que yo enbie mandar por la otra mi carta; et lo demas que fincar que lo guarde para fazer dello lo que yo mandar(e).

Et uos nin ellos non fagades ende al por ninguna manera.

Dada en Seuilla, VIIIº dias de dezienbre, era de mill et trezientos et sesenta et VIIIº annos. Yo, Diego Perez, de la camara, la fiz escreuir por mandado del rey. Alfonso Gonzalez, vista. Pedro Alfonso, registro.

